

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA KANTONA SARAJEVO**



EKSPOZE PREMIJERA

Sarajevo 15. 11. 2023

Premijer KS:
Nihad Uk

Poštovani predsjedavajući, zamjenici predsjedavajućeg Skupštine Kantona Sarajevo, uvažene zastupnice i zastupnici, uvaženi predstavnici medija, drage gledateljke i gledatelji Televizije Kantona Sarajevo, dame i gospodo,

Danas stojim ponovo pred vama i tražim podršku da još hrabrije i energičnije nastavimo posao koji smo započeli. Bilo bi politički i ljudski nekorektno praviti značajne izmjene u odnosu na viziju koju sam za ovom govornicom izložio vama i građanima koje ovdje predstavljamo. Stojim iza mog svjetonazora, vizije, načina rada i shvatanja prioriteta, kao i obećanja koje sam dao. Podsjetit ću ukratko na neke od smjernica, ciljeva Vlade, prioriternih pitanja i načina na koje ih rješavamo i planiramo nastaviti rješavati, kako sam rekao, još odlučnije i hrabrije.

U ekspozeu koji sam vam svojevremeno prezentirao, poseban naglasak sam stavio na mlade, na ozbiljnije, a ne samo deklarativno, involviranje u rješavanje njihovih problema i prioriteta a sve sa ciljem njihovog kvalitetnijeg života i ostanka u Bosni i Hercegovini. To vidim kao moju ličnu, ali i našu zajedničku generacijsku bitku za ovaj grad i Bosnu i Hercegovinu. Od mog prvog obraćanja do danas ostvarili smo ozbiljne iskorake i rezultate u različitim resorima, na koje zajedno možemo biti ponosni.

- Vlada je izdvojila pet i po miliona KM za pomoć mladima pri kupovini stana;
- omogućili smo besplatne udžbenike za sve đake osnovnih škola u Kantonu Sarajevo, kao i besplatne karte za javni gradski prevoz svim studentima i učenicima;
- položili smo kamen temeljac i započeli radove na izgradnji Univerzitetske biblioteke koja će biti simbol naših stremljenja da Sarajevo pokaže svoju regionalnu i evropsku ambiciju kada je u pitanju obrazovanje;
- zadovoljstvo mi je najaviti da smo započeli i izradu Strategije za mlade 2024 – 2028 godina, čiji ćemo nacrt ovdje razmatrati već u narednim sedmicama.

Od većine drugih rješenja ekonomske, socijalne i komunalne politike koje smo realizovali u prethodnom periodu, korist će imati upravo naši mladi ljudi: pri tome mislim i na izgradnju decenijama čekane pruge i poboljšanja gradskog prevoza u našem Kantonu.

Rekao sam, također, kako ova Skupština i Vlada moraju biti ogledalo Sarajeva, isticati njegovo dostojanstvo i reputaciju koje su mu ostavile neke generacije davno prije nas. Istovremeno, Sarajevo mora biti refleksija dostojanstva naše Bosne i Hercegovina, ono je njen glavni grad. Po Sarajevu nas prepoznaje čitav svijet. To je odgovornost koje u svakom momentu moramo biti svjesni. Sarajevo danas ima historijsku šansu da zasija na mapi regiona, Evrope i svijeta.

Vizionarskim razmišljanjem trebamo vratiti samopouzdanje i vjeru našim građanima da na ovaj način promišljaju i doživljavaju Sarajevo.

Brojni su projekti koji nas usmjeravaju na tom putu, nabrojat ću samo neke:

- završili smo rekonstrukciju pruge i započeli novi krak prema Hrasnici;
- pokrenuli smo subvencije za otvaranje novih aviolinija prema Sarajevu, dok će efekte subvencija naši građani i privreda osjetiti već naredne godine;
- vratili smo vlastite prihode našim ustanovama kulture omogućivši im stabilnije finansiranje, ali još važnije - motivišući ih da proizvode svjetske kulturne sadržaje, po čemu smo već prepoznati.

Kultura je naša lična karta!

Rekao sam da ne trebamo gledati samo sebe, već kao glavni i najveći grad pomagati i druge – i to smo radili, čestito i predano. Primjera je opet mnogo, ali izdvojit ću podršku radu Memorijalnog centra u Srebrenici i pomoć narodu Palestine. Bio sam prvi zvaničnik iz BiH, i na to sam posebno ponosan, koji se obratio ambasadoru Palestine u BiH s molbom da nam daju smjernice kako da najučinkovitije pomognemo građane Palestine u njihovim najtežim danima.

Ono što smatram jednim od svojih najvažnijih zadataka, a to sam naveo i u prethodnom programu i akcionom planu, jeste da u Vladi održavam nivo saradnje, komunikacije i transparentnosti na što kvalitetnijem nivou te da s kolegama ministrima istu tu sinergiju reproduciramo na naše građanke i građane. Kad su u pitanju građanke i građani, evidentno je da su počeli ovu Vladu i Skupštinu u zavidnoj mjeri doživljavati kao sredstvo za poboljšanje vlastite kvalitete života. Oni su nam uistinu veliki podstrek i značajan korektiv pri rješavanju brojnih problema iz najrazličitijih aspekata života u Kantonu. Ta sinergija već postoji i sa novim sazivom Vlade samo ćemo je dodatno ojačati. Tu smo, slušamo vas, ovo je vaša Vlada. Preuzimamo odgovornost ne samo za najbolje rezultate već i za one rezultate koji nisu ispunili naša očekivanja. Zato želim da znate i o onom čime nisam zadovoljan. Sprega koju smo imali unutar Vlade i skupštinske većine, na mjestima je labavila i s vremenom pukla.

Otuda se i stvorila potreba za rekonstrukcijom Vlade.

Uvjeren sam da će novi saziv pokazati najviši stupanj svijesti o važnosti jedinstvenog djelovanja po prioritetnim stvarima za naš Kanton. Što se tiče prioriteta, to su:

- nastavak transformacije javnog prijevoza;
- dodatni poticaji za rješavanje stambenog pitanja mladih;
- otvaranje poslovnih zona;
- izgradnja modernog univerzitetskog kampusa

Poseban naglasak bih sada stavio na čistoću naših ulica. To je segment naših aktivnosti gdje, nažalost, do sada nismo imali rezultate na kojima insistiram. Ulice Sarajeva i ostalih mjesta u Kantonu trebaju i moraju biti lice našeg grada. Odnos prema smeću i otpadu se mora početi mijenjati. Promjenom navika odlaganja i reciklaže ulažemo u evropsko Sarajevo. Za viziju besprijekornog Sarajeva koju imamo i za koju se nadam svi zajedno ovdje zalažemo potrebna nam je stabilna podrška iz skupštinskih klupa. Zbog svega navedenog vas pozivam, opozicija meni, stranci ili koaliciji koju predstavljam možete biti, ali ne dozvolimo da bilo ko od nas bude opozicija Sarajevu. Za one koji vole ovaj grad i naš Kanton, moja vrata su uvijek otvorena.

No, dopustite mi ipak da istaknem šta će to biti prioritet unutar pojedinih resora:

Ministarstvo pravde i uprave

Glavni fokus aktivnosti Ministarstva pravde i uprave u narednom mandatu bit će na digitalnoj transformaciji javnog sektora u Kantonu Sarajevo i izmjenama propisa potrebnih da se ova transformacija dogodi. Digitalizacija će podići kvalitetu usluge građankama i građanima Kantona, koji će do kraja ovog mandata svojim digitalnim potpisom preuzimati dokumente, aplicirati, tenderisati, plaćati usluge i obavljati druge slične radnje što je ustaljena praksa u cijeloj Evropi.

Nadalje, u cilju usaglašavanja pravnog okvira s Evropskom poveljom o lokalnoj samoupravi i implementacijama presuda Ustavnog suda Federacije Bosne i Hercegovine, Ministarstvo pravde i uprave će predložiti amandmane na Ustav Kantona Sarajevo kao i tekst Zakona o lokalnoj samoupravi Kantona Sarajevo. Ministarstvo će u narednom mandatu biti i nosilac aktivnosti u vezi s mapiranjem koraka potrebnih za ustavno-pravnu reformu Kantona Sarajevo, a u skladu s dugoročnim ciljem transformacije Kantona u Sarajevo grad-kanton po uzoru na brojne evropske prijestolnice.

Ministarstvo će nastaviti aktivnosti iz prethodnog mandata koje se odnose na jačanje kapaciteta pravosudnih institucija i jačanje Ureda za borbu protiv korupcije i osiguranje kvalitete Kantona Sarajevo, kroz trajno rješavanje statusa Ureda i njegovih nadležnosti koje bi bile utvrđene posebnim zakonom.

Ministarstvo zdravstva

Prioritet će biti primarna zdravstvena zaštita sa akcentom pojednostavljenja tzv. puta pacijenta. Dodatno ćemo intenzivirati i proširiti preventivne programe. Prevencija je stvar države, državne politike i strategije i to je najbolje ulaganje u zdravlje i budućnost naših građana i države. Paralelno s prethodnim izradit ćemo Strategiju razvoja zdravstva u Kantonu Sarajevo s jasno postavljenim, ali mogućim i održivim ciljevima i mjerama.

Potrebno je u što skorijem roku uvezati u elektronski sistem sve zdravstvene ustanove u Kantonu Sarajevo. Nema više nikakvog opravdanja da neke ustanove još nisu u cijelosti prešle na elektronski sistem vođenja medicinske dokumentacije, medicinski elektronski karton i elektronski recept.

Ministarstvo komunalne privrede, infrastrukture, prostornog uređenja, građenja i zaštite okoliša

Nigdje se kvaliteta svakodnevnog života građanki i građana ne vidi kao kroz djelovanje u komunalnom sektoru. Gradska čistoća je prioritet. Ne samo da ćemo grad držati čistim tako što ćemo uložiti u naša kantonalna preduzeća, već ćemo i pozvati građane i građanke na saradnju kroz kontaktni centar. Podizanje svijesti o čistoći pomoći ćemo i aktivnim radom komunalne policije.

U prethodnom mandatu izradili smo studiju opravdanosti analize različitih opcija za tretman otpada koja se povezuje s održivim upravljanjem otpadom i vrlo brzo ćemo morati donijeti odluku u kojem pravcu želimo ići. Ono u što sam siguran već danas jeste da je pitanje zbrinjavanja otpada, njegovo pametnije, ekonomski isplativije i ekološki opravdanije zbrinjavanje bazirano na konceptu cirkularne ekonomije, opredjeljenje kojim ću se voditi, nadam se uz vašu podršku.

Nastavit ćemo ulaganje u vodovodnu i odvodnu infrastrukturu i stavit ćemo naglasak na naše zelenilo. Pošumljavanje na obroncima grada, ali u samom gradu će postati svakodnevnica. Želimo da građanke i građani osjete naš trud i da zajedno držimo grad čistim kao da se radi o našim dvorištima. Čistoća je ogledalo grada, a Sarajevo zaslužuje samo najbolje.

Efikasnije upravljanje našim preduzećima postići ćemo osnivanjem Sarajevskog holdinga, digitalizacijom i objedinjavanjem strateških javnih nabavki za komunalni sektor.

Borba za okoliš je borba za evropsko Sarajevo. Aktivnosti na poboljšanju kvalitete zraka preklapaju se po različitim resorima, ali ih je važno spomenuti i u ovom kontekstu. Kontinuitet u razvoju javnog gradskog saobraćaja kao mjere kojom se potiče smanjenje broja privatnih automobila na ulicama, implementacija projekata iz Zelenog akcionog plana poput proširenja mreže biciklističkog saobraćaja i jačanje kapaciteta Centra za upravljanje kvalitetom zraka, neki su od koraka ka boljem zraku i zdravijem Sarajevu.

Usvojiti ćemo Urbanistički plan i tako stvoriti uslove za planski razvoj našeg Kantona.

U naredne četiri godine završiti ćemo projekat utopljanja javnih objekata i dalje raditi na proširenju mreže centralnog grijanja. Nastavljamo sa zamjenom malih kućnih ložišta i pokrenut ćemo projekat poticajne ugradnje solarnih panela u individualnoj stambenoj gradnji i u procesu izrade registra bespravne gradnje i mjera za sanaciju problema nastalih ignoriranjem ovog višedecenijskog problema koji je sasvim sigurno doprinio i lošoj kvaliteti zraka u gradu.

Nastavit ćemo poticajnu stanogradnju putem boračkog i kantonalnog stambenog fonda, ali i poticajima za rješavanje stambenog pitanja mladih porodica.

Ministarstvo saobraćaja

Javni prevoz je krvotok svakog modernog grada. Sarajevo zaslužuje nastavak intenzivnog investiranja u javni prevoz. Izvjesno je da će narednih sedmica biti isporučen i prvi od 15 novih tramvaja.

Nakon 35 godina, kad je prvi put ucrtana u plansku dokumentaciju, tramvajska pruga prema Hrasnici se počela graditi. Vozit ćemo se u ovom mandatu i trolejbusom do Vogošće, a novi i bolji javni prevoz će imati moderni saobraćajni centar s adaptivnim upravljanjem raskrscima. Tako će za tramvaj uvijek biti zeleno svjetlo i sve veći broj građanki i građana će birati javni prevoz umjesto sopstvenog automobila. Usluge javnog prevoza će se plaćati elektronski, a planskom dokumentacijom ćemo otvoriti mogućnost za novi ciklus investiranja. Nema razloga da tramvaj ne dovedemo na Dobrinju i na Šip. Ulaganje u održivi električni transport je ne samo naša budućnost, nego će doprinijeti i čistijem zraku.

Nastavit ćemo saradnju sa Željeznicama Federacije BiH na poboljšanju usluga prevoza vozom od Tarčina do Ilijaša. Pomoći ćemo da se sagrade parkinzi i pristupne rampe kako bi veći broj građanki i građana odlazak u urbani dio Sarajeva obavljao javnim prevozom.

Izgradnja pješačke i biciklističke infrastrukture mora dobiti veću važnost. Gledamo kako evropski gradovi prolaze kroz transformacije, posebno u strogom centru, gdje je kretanje pješke ili biciklom daleko poželjnije nego automobilom. U vezi s ovim, naći ćemo način i da proširimo ponudu električnih bicikala te da stimuliramo korištenje električnih automobila.

Resor saobraćaja će biti jedan od najvidljivijih i osjetim ushićenje najavljujući sve ove projekte.

Ministarstvo za rad, socijalnu politiku, raseljena lica i izbjeglice

Socijalna politika je ogledalo jednog društva, te shodno tome nastaviti ćemo osnaživanje sistema socijalne zaštite kroz nove zakonodavne okvire uz podršku struke.

Prioriteti rada ovog Ministarstva bit će borba protiv siromaštva i socijalne isključenosti te smanjenje nejednakosti u društvu. To, između ostalog, podrazumijeva jačanje kapaciteta centara za socijalni rad koji su okosnica socijalne zaštite, a u cilju pružanja što kvalitetnije usluge našim najranjivijim kategorijama.

Također, prioritet će biti i unapređenje međuresorne saradnje u zaštiti navedenih skupina, nastavljanje procesa transformacije ustanova socijalne zaštite i osiguranje razvoja i dostupnosti socijalnih usluga na razini lokalne zajednice. Nastavit ćemo i s osnaživanjem hraniteljstva kao najadekvatnijeg oblika alternativne zaštite za djecu bez roditeljskog i starijih bez porodičnog staranja te povećanjem naknada korisnicima.

Kontinuirano ćemo raditi na programima započetim u ranijim mandatima, a detaljno pobrojanim u Programu skupštinske većine.

Nastavit ćemo reformu tržišta rada, posebno stavljajući akcenat na ciljanu kvalifikaciju i prekvalifikaciju radne snage u skladu sa zahtjevima tržišta rada, boreći se protiv odlaska mladih iz našeg Kantona i države.

Ministarstvo unutrašnjih poslova

Strateško opredjeljenje Vlade Kantona Sarajevo bit će jačanje Ministarstva unutrašnjih poslova Kantona Sarajevo ljudskim resursima, modernizacijom stare i nabavkom nove opreme. Kao administrativno sjedište i glavni grad Bosne i Hercegovine imamo dodatnu odgovornost da sigurnosni sektor funkcioniše besprijekorno.

Ponosan sam što smo u proteklih šest mjeseci Vlade, nakon dvadesetak godina priča i različitih ideja, učinili prvi važan korak u procesu izgradnje zgrade MUP-a. Do kraja mandata očekujem da ćemo završiti zgradu, našim policajcima omogućiti dostojanstveno radno okruženje, a svima nama uljepšati dio grada gdje je planirana zgrada.

Ministarstvo privrede

Ministarstvo privrede će intenzivno raditi na prilagođavanju zakonskih propisa potrebama savremenog tržišta i poslovanja. Pored toga, Ministarstvo će, osim ustaljene podrške lokalnim samoupravama u uređenju poslovnih zona, raditi i na uspostavi poslovne zone „Doglodi“, jedne od najvećih poslovnih zona na teritoriji Bosne i Hercegovine, koja će biti u nadležnosti Vlade Kantona Sarajevo. Ministarstvo će, također, raditi na izradi Zakona o preduzetničkoj infrastrukturi. Shodno Strategiji razvoja Kantona Sarajevo za period 2021. – 2027. Ministarstvo privrede će s ciljem razvoja strateških grana privrede raditi i na izradi Zakona o poticaju strateškim granama privrede, kao i daljnjem unapređenju poticajnih programa za razvoj poduzetništva.

Ministarstvo će donijeti novi Zakon o turizmu i Turističkoj zajednici Kantona Sarajevo i novu Strategiju razvoja turizma te niz drugih dokumenata koji će jačati poziciju i razvoj turizma i Turističke zajednice Kantona.

Ministarstvo privrede prepoznaje i valorizuje značaj razvoja olimpijske infrastrukture i širenje sadržaja na Bjelašnici i Igmanu, pa će, stoga, u prvom redu raditi na realizaciji obnove višegodišnjih započetih projekata na ovim planinama, ali i na kreiranju potpuno novih sadržaja kao što su nove skijaške staze, vertikalni transport, uključujući gondolu, pješačke i biciklističke staze, dječiji ljetni i zimski parkovi i drugo.

Ulaganjem u planinarsku infrastrukturu podići ćemo nivo ponude u planinarstvu koji je u ekspanziji kod rekreativaca a ujedno predstavlja veliki adut Kantona za razvijanje „outdoor“ turizma.

Globalne društvene promjene pokazale su važnost i značaj domaće proizvodnje hrane i nacionalne neovisnosti u oblasti proizvodnje energije, stoga je ovo Ministarstvo opredijeljeno kontinuirano ulagati u razvoj poljoprivredne proizvodnje, kao i razvijati efikasne instrumente za strateško upravljanje i korištenje prirodnih resursa i obnovljivih izvora energije što, prije svega, znači istraživanje prirodnih resursa na području Kantona i uspostavljanje registra koncesionih polja. Uz jasno detektovanje prirodnih bogatstava, na ovaj način se doprinosi i jačanju transparentnosti kod dodjela koncesija za korištenje prirodnih dobara.

Kao bitan segment ukupnog privrednog ambijenta prepoznavamo i opće veterinarsko zdravlje i radimo na jačanju sigurnosti hrane, ali i građana i građanski na ulicama pa su stoga projekti humane depopulacije pasa i mačaka prioritet. Tu je neizostavno spomenuti i petogodišnji projekat osjemenjivanja u govedarstvu što je također u vrhu prioriteta ovog Ministarstva.

Na kraju, s ciljem da ovaj Kanton bude prepoznat kao mjesto ugodnog življenja i prosperitetnog poslovanja, Ministarstvo privrede će nastaviti ulagati u tehnološku modernizaciju, ekološku i digitalnu tranziciju malih i srednjih poslovnih subjekata.

Ministarstvo za odgoj i obrazovanje

Odgoj i obrazovanje kao djelatnost od posebnog značaja za Kanton Sarajevo zadržat će do kraja mandata visoko mjesto na skali prioriteta ove Vlade. Započeta implementacija obrazovne reforme postavljat će nove izazove pred obrazovnu zajednicu na koju obrazovne vlasti u Kantonu Sarajevo moraju prikladno odgovoriti. To će se prevashodno realizirati kroz stalnu stručnu podršku nastavnica implementatorima reforme, dodatno finansiranje projekata rekonstrukcije i nabavke opreme i materijala.

Obrazovna reforma ciljeve postavlja šire od tradicionalne fokusiranosti na učenička postignuća i poziva na proširenje perspektive tako da sve više obuhvata pitanja dobrobiti učenika, njihove sreće i zadovoljstva ukupnim školskim doživljajem. Svjesni smo da moramo uložiti dodatne napore da transformišemo školski ambijent i osiguramo najbolje, motivirajuće uvjete za rast i razvoj svakog učenika i učenice, posebno se osvrćući na učenike i učenice iz ranjivih kategorija i gradeći široku mrežu podrške kroz inkluzivne prakse.

Već smo napravili prve korake u procesu transformacije školske užine. Do kraja mandata cilj nam je da svakoj učenici i učeniku u Kantonu Sarajevo osiguramo dobar, kreativno osmišljen, zdrav i pristupačan obrok.

Nastavit ćemo ulagati napore da zadržimo leadersku poziciju kada je u pitanju obuhvat djece predškolskim odgojem i obrazovanjem ne samo proširenjem broja javnih i privatnih predškolskih ustanova, već i nastavkom subvencioniranja odlaska djece u vrtić kao jedne od najpopularnijih mjera iz prethodnog mandata. Postepeno ćemo uvoditi koncept dualnog obrazovanja nudeći tako što realističniji doživljaj tržišta rada i prilike za zapošljivost i učenje u realnom okruženju našim učenicima i učenicama.

Ministarstvo kulture i sporta

Sarajevo mora biti kulturni centar regije. Kulturi ćemo vratiti status koji zaslužuje, a kulturnim radnicima i kulturnoj industriji obezbijediti centralno mjesto u našem društvu. Nastavit ćemo približavanje kulture građanima i građankama kroz projekat Kultura na ulice. Igrat će se predstave i svirati koncerti na ulicama našeg grada.

Osim izgradnje muzeja Ars Aevi, napokon ćemo završiti zgradu Akademije scenskih umjetnosti, koja je stajala u mjestu do prije par godina. Nedopustivo je da naš grad nema koncertnu dvoranu i predano ćemo raditi da ovu nepravdu ispravimo.

Potaknut ćemo poduzetnike da organizuju koncerte, festivale i da mladi svaki vikend mogu izabrati koncert na koji će ići, a ne da planiraju odlazak u druge gradove kako bi zadovoljili osnovnu potrebu za kulturnim sadržajem. Investirat ćemo u audio opremu, prvo u Narodno pozorište, Sarajevski ratni teatar, Bosanski kulturni centar, a onda i u Dom mladih Skenderija, kako bosanskohercegovački i regionalni izvođači ne bi svirali po podrumima, već tamo gdje i pripadaju, u dobro opremljenim koncertnim prostorima.

Kulturni sektor je i industrija. Svaka budžetska marka uložena u nezavisnu kulturu vraća četiri marke kroz ekonomsku aktivnost. Ovo je činjenica zbog koje gradovi i države potiču nezavisnu kulturnu djelatnost. Nastavit ćemo s poticajima za audio-vizuelno stvaralaštvo, kako bi se u Sarajevu snimale serije i filmovi, kao i s poticajima za kreativne filmske projekte. U Sarajevu mora ne samo da se svira, već i da se snima.

Podržat ćemo i nezavisne kulturne projekte, poput novog Muzeja islamske kulture i umjetnosti u Sarajevu, Ex-YU rok centra, festivale elektronske i druge muzike, galerije, pojedinačne događaje i, naravno, naš Sarajevo Film Festival. Još jednom ponavljam, kulturna i kreativna industrija je nešto što proizvodi ekonomsku aktivnost, ali je to i industrija koja će vratiti Sarajevu mjesto koje mu pripada, a to je centralno mjesto u regiji.

Sport u Sarajevu je i dalje u vrhu interesovanja, ali, nažalost, danas imamo samo sjećanja na velike rezultate iz prošlosti. U proteklih šest mjeseci Vlada Kantona izdvojila je rekordna sredstva, finansirajući sarajevski profesionalni sport. To ćemo i nastaviti u narednom periodu, kako bi ga vratili na stare staze slave. Kriza sporta u Kantonu Sarajevo nije odlika samo na profesionalnom, već i na rekreativnom nivou. S tim u vezi cilj nam je da naredni period iskoristimo u ulaganje u programe i infrastrukturu rekreativnog sporta.

Ministarstvo za nauku, visoko obrazovanje i mlade

Visoko obrazovanje ima poseban značaj za razvoj i transformaciju društva. Kao što sam pomenuo kulturnu i kreativnu industriju u smislu četverostrukog povrata ulaganja kroz ekonomsku aktivnost, na isti način se društvu oduži svako ulaganje u naučno-istraživačku djelatnost. Potrebno je stalno uvećavati iznos za projekte koji će na našim fakultetima otvarati moderne laboratorije kroz koje ćemo dobiti novu generaciju naučnika i naučnica te poduzetnica i poduzetnika. Društvo znanja se dobija intenzivnim ulaganjem, a ne postoji mjesto na svijetu gdje se ulaganje u nauku nije višestruko vratilo.

Cilj nam je da se visokoškolske ustanove razvijaju u naučne centre koji će davati smjernice i biti motor napretka našeg društva i privrede. Uspostavit ćemo Fond za nauku, inovacije i razvoj koji će na sistemski način urediti naučno-istraživačku djelatnost u našem Kantonu, s akcentom na projekte koji će doprinijeti ekonomskom razvoju našeg Kantona.

Razvoj Kampusa ima potencijal da potpuno transformiše pogled građana i građanki na sopstveni grad, a konačna izgradnja će staviti Sarajevo na mapu najljepših univerzitetskih centara Evrope. Dovršetak zgrade Akademije scenskih umjetnosti, izgradnja Univerzitetske biblioteke i adaptacija studentskih domova samo su neki od projekata kojim se želimo približiti zacrtanom cilju.

Ministarstvo finansija

Akcentat rada u Ministarstvu finansija bit će prevazilaženje finansijskih izazova nastalih kažnjavanjem građana Kantona Sarajevo i samog Kantona Sarajevo, izmjenama i dopunama Zakona o pripadnosti javnih prihoda koje će naš budžet u narednim godinama koštati preko 100 miliona KM godišnje. Aktivnim upravljanjem finansija i dugom, efikasnijom naplatom ostalih budžetskih prihoda kao i stavljanjem cjelokupne imovine i javnih dobara Kantona Sarajevo u funkciju s ciljem povećanja upotrebne vrijednosti s jedne strane, a s druge strane osiguranjem dodatnih prihoda budžeta će prevazići ove izazove.

Ministarstvo za boračka pitanja

Ovu oblast najprije treba sagledati kroz broj potencijalnih korisnika i korisnica boračko-invalidske zaštite u Kantonu Sarajevo, pri tom imajući u vidu da je na prostoru Kantona Sarajevo preko 80.000 demobiliziranih boraca, 8.192 ratnih vojnih invalida korisnika lične invalidnine, 9.056 porodica šehida i poginulih boraca korisnika porodične invalidnine te 781 nosilac najvišeg ratnog priznanja i odlikovanja zajedno s učesnicima narodno-oslobodilačkog rata. Ako na ove brojke dodamo i članove porodičnog domaćinstva, supruge i djecu, obuhvat korisnika i korisnica ove zaštite je daleko širi nego što je naprijed navedeno.

Ministarstvo za boračka pitanja kroz realizaciju Programa rada u prvom redu kao zadatak ima ostvarivanje prava utvrđenih Zakonom o dopunskim pravima boraca – branitelja BiH, ukupno 30 prava, te realizaciju važećih skupštinskih odluka, počevši od Odluke o usvajanju projekta Opsada i odbrana 1992. – 1995., Odluke Skupštine Kantona Sarajevo o utvrđivanju Kalendara za obilježavanje značajnih događaja, datuma i ličnosti iz perioda 1992. – 1995. godine, kao i za period 1941. – 1945., Odluke o proglašenju boračkih udruženja, organizacija i saveza od posebnog interesa za Kanton Sarajevo i druge.

Vjerujem da ste iz izloženog jasno mogli uvidjeti koliko je velikih stvari pred nama te u kojoj mjeri iziskuju političku odgovornost. Uvjeren sam da ćemo kao tim, ovih 12 časnih osoba sa vaše lijeve strane i moja malenkost, odgovoriti ukazanom povjerenju.

Na kraju, obraćam se vama u sali, ali i svim našim građanima. Kolegama iz opozicije, kolegama iz koalicije, onima koji se ne slažu i slažu. Riječ podjela se nažalost često veže za našu državu. Imamo odgovornost da to promijenimo. Krenimo od našeg glavnog grada, koji jeste i mora biti pokretač i predvodnik društvenog, ekonomskog, kulturnog, generacijskog napretka.

Budimo dostojni ovog grada i velikog zadatka.